

PEMBERITAHUAN PERTANYAAN
DEWAN RAKYAT, MALAYSIA

PERTANYAAN : **LISAN**

DARIPADA : **YB. TAN SRI DATUK SERI PANGLIMA
ANNUAR BIN MUSA**

KAWASAN : **KETEREH**

TARIKH : **16 MAC 2015 (ISNIN)**

NO. SOALAN : **29**

SOALAN

YB. TAN SRI DATUK SERI PANGLIMA ANNUAR BIN MUSA [KETEREH] minta MENTERI PERDAGANGAN ANTARABANGSA DAN INDUSTRI menyatakan kedudukan terkini berhubung dengan Perjanjian Perkongsian Trans Pasifik (TPPA) dan apakah halangan dalam pelaksanaan perjanjian terbabit.

JAWAPAN

Tuan Yang Di Pertua,

Perjanjian Perkongsian Trans Pasifik (TPP) masih dalam proses rundingan dan belum dimuktamadkan. Mesyuarat Ketua-Ketua Perunding TPP yang terkini telah diadakan di New York City, Amerika Syarikat pada 28 Januari hingga 1 Februari 2015 di Hawaii, Amerika Syarikat pada 9 hingga 15 Mac 2015.

Secara keseluruhannya, sepuluh bab telah selesai dirundingkan dan terdapat kemajuan positif bagi bab-bab tertentu seperti barangan, peraturan tempasal, syarikat hak milik Kerajaan dan perundangan. Namun demikian masih terdapat jurang perbezaan yang ketara di dalam pendirian ahli-ahli di dalam bab hak harta intelek dan alam sekitar.

Untuk makluman, setakat ini, bab rundingan yang telah dimuktamadkan adalah seperti berikut:

- i. Pembangunan;
- ii. *Regulatory Coherence, dengan izin;*
- iii. Daya saing dan fasilitasi perniagaan;
- iv. Enterpris kecil sederhana;
- v. Kemasukan sementara tenaga mahir;
- vi. Kerjasama dan pembinaan kapasiti;
- vii. Pentadbiran dan Institusi;
- viii. Dasar Persaingan (Seksyen A);
- ix. Telekomunikasi; dan
- x. Pentadbiran Kastam

Dari segi akses pasaran, kesemua negara TPP telah berkongsi tawaran penghapusan duti import barangan pada 28 Januari 2015. Secara keseluruhan Malaysia telah menerima tawaran akses pasaran yang memuaskan daripada kesemua negara ahli. Walau bagaimanapun, Malaysia masih terus merunding untuk mendapat akses pasaran yang lebih baik dengan sesetengah negara dalam TPP, termasuk dengan Amerika Syarikat dan Mexico dimana rundingan akses pasaran masih berterusan.

Tuan Yang Dipertua,

Malaysia masih menghadapi cabaran bagi isu dan bab yang bukan konvensional seperti Syarikat Milik Kerajaan (SOE), Perolehan Kerajaan (GP), Hak Harta Intelek, dan Mekanisme Penyelesaian Pertikaian Pelabur-Negara (ISDS).

Bagi isu SOE, Malaysia masih merunding untuk mengecualikan beberapa entiti SOE Malaysia, mendapatkan *threshold* yang lebih tinggi, serta tempoh transisi yang lebih panjang bagi memastikan kesediaan yang lebih rapi dalam menghadapi TPP. Ini kerana Kerajaan sedar bahawa entiti-entiti ini bukan sahaja beroperasi atas sebab komersial semata-mata, tetapi juga berperanan dalam menyusun semula sosio-ekonomi negara yang begitu signifikan dalam mempengaruhi kesejahteraan masyarakat dan rakyat Malaysia.

Bagi isu perolehan kerajaan, Malaysia sedang merundingkan *threshold* yang lebih tinggi bagi penyertaan syarikat asing dalam tender-tender perolehan kerajaan. Dalam erti kata lain, kontraktor asing hanya dibenarkan bagi perolehan kerajaan yang bersifat gergasi. Ini seterusnya meminimumkan impak ke atas syarikat kecil sederhana tempatan.

Begitu juga dengan rundingan mengenai ISDS, pasukan rundingan masih berunding secara teliti terhadap skop ISDS.

Manakala bagi rundingan Hak Harta Intelekt, isu yang masih tertunggak ialah isu berkaitan farmaseutikal, hak cipta, dan indikasi geografikal yang perlu diselesaikan melalui rundingan yang lebih tinggi diperingkat menteri atau pemimpin.

Tuan Yang Dipertua,

Bagi mencari jalan penyelesaian bagi isu-isu yang sukar bagi Malaysia, langkah-langkah yang diambil adalah seperti berikut:

- i. Sesi konsultasi bersama kumpulan pakar, termasuk Cleared Advisor yang dilantik untuk mendapatkan pandangan dan pendekatan penyelesaian yang boleh di terima. Untuk makluman sejumlah 56 sesi konsultasi telah diadakan sepanjang tahun 2013, 40 sesi sepanjang tahun 2014 dan sehingga Februari 2015, sebanyak 5 sesi konsultasi TPP telah dijalankan oleh Kementerian Perdagangan Antarabangsa dan Industri.
- ii. Sesi konsultasi bersama ahli Kaukus Parlimen. Sesi terkini telah diadakan pada 2 Mac 2015.
- iii. Makmal TPP atau workshop pada awal April 2015, berdasarkan keputusan Jemaah Menteri pada 18 Februari 2015. Makmal ini akan dikendalikan oleh PEMANDU untuk membincangkan isu SOE, GP dan ISDS. Makmal ini akan melibatkan pelbagai pihak berkepentingan termasuk pemimpin tertinggi badan-badan berkanun, syarikat milik kerajaan, badan bukan kerajaan, Ahli Parlimen Caucus, barisan Cleared Advisors TPP, ahli ekonomi

dan ahli akademia supaya bersama-sama untuk mencari penyelesaian alternatif bagi isu sensitif yang dirundingkan bawah TPP.

Tuan Yang Dipertua,

Seperti mana telah diumumkan Kerajaan akan membenteng hasil rundingan TPP yang muktamad bersama-sama hasil kajian yang lengkap di Parlimen nanti. Mesyuarat Khas Jemaah Menteri pada 15 Ogos 2013 telah bersetuju untuk melaksanakan Kajian Kepentingan Negara mengenai Penglibatan Malaysia dalam Perjanjian TPP dan Analisis Kos Faedah mengenai impak TPP ke atas Bumiputera dan Industri Kecil Sederhana (IKS).

Kedua-dua Kajian Kepentingan Negara dan Analisis Kos Faedah dilaksanakan secara masing-masing oleh Institute of Strategic and International Studies (ISIS) dan Price Waterhouse Coopers (PwC). Kedua-dua kajian yang diselesaikan kini, masih bersifat interim kerana dapatan kajian adalah berlandaskan kedudukan semasa rundingan dan bersifat andaian.

Kerajaan juga telah mengarahkan supaya kajian kos dan faedah atas impak TPP fasa kedua disegerakan bagi membantu Kerajaan dalam membuat penilaian terhadap penyertaan dalam TPP. Fasa kedua akan dilaksanakan berlandaskan kepada 4 aspek utama, iaitu 1) kedaulatan negara dan ruang dasar negara; 2) impak ke atas Bumiputera; 3) impak ke atas Industri Kecil Sederhana tempatan dan 4) Apa sekiranya Malaysia tidak berada dalam TPP? Kajian ini dijangka dapat diselesaikan dalam masa yang singkat selepas tamat rundingan.